

Duez Gugt Ndinghal Duez Ducrec

Lix duez gugt ndeeul, deel dungx ieh, qyuh jaangl ndoongl faix ral gaais genl. Deel yius reenl ndael nyal lix duez ducrec ninz, duez gugt neeh neeh byaaic bail dangz reedt jaec duez ducrec, iadk fengz bail gaab ndaix deel.

Xez duez gugt hac genl duez ducrec deec, deel yius reenl reedt jaec deec lix duez lux nec ndeeul. Deel xeel duez ducrec nec deec xus jiez deec, xic seedt bail laih duez lux. Duez lux rooxheeh duez gugt laih deel xic seedt deeuz bais. Duez lux yoongc bail jail, ndingh seedt ndingh nyamz, duez gugt xingh laih, mizguanc laih miz ndaix.

Duez gugt daaus dauc dangz jiez deel gaab duez ducrec deec, mizguanc xic duez ducrec yac deeuz bais. Duez ducrec qyuh xez duez gugt laih duez lux deec xic gueh raag deeuz bais. Duez gugt ianh bais, gah nauz: “Rooxheeh banz dangcnix xaux, gul xic aanh genl duez ducrec deec goons.”

Xooix Legsaail Neec Dogt Ramx

Lix ngonz ndeeul, lix xooix legsaail neec ndeeul qyuh ndael dah aabk. Ndael dah lix jiez ndeeul laag laail, ramx jiez deec gueeuc baaih daiz. Deel miz roox, deel xic yuz bail dangz heenz ramx gueeuc deec xaaux rooxheeh jiez deec banz dangcdeec, deel xic ndillaaul laail. Deel eemh reenl jaangl ronl lix bux ndeeul guas, deel xic heeuh jaus.

Bux wenz deec rooxnyiel hingl heeuh jaus, deel xic sooh seedt bail dangz xic yuz bail jiez legneec deec, reenl ramx jiez deec gueeuc laauhhoh, xic ndah xooix legsaail neec deec nauz: “Mengz guehmaz uax banz dangcnix, miz rooxnac ronl daail. Jiez nix ramx gueeuc banz dangcnix, neec deeml gueeuc mengz bail ndael deec, mengz xic daail bais.”

Xooix legsaail neec nauz: “Mengz jaus gul bail rooh goons, ieh mengz gueh dangclaez hudt gul yac ndil.” Ieh bux deec xic jaus xooix legsaail neec deec dauc rooh. Miz lix bux nix jaus, xooix legsaail neec deec xic daail bais.

Duez Gugt Ndinghal Duez Neengz

Lix duez neengz ndeeul jah laauhhoh. Lix ngonz ndeeul deel bungz duez gugt ndeeul. Deel riangz gugt nauz: “Gul aul ndodt liadk mengz.” Duez gugt hooznyaz laauhhoh, ax bas lac haab duez neengz. Duez neengz soohnyaangh mbinl bail duh riez duez gugt. Gugt aul fengz bail dac deel, mizguanc haaix miz deg neengz, xic gah haaix deg nac ndaanglgaus.

Duez neengz nauz: “Gul aul loongh mengz gueh nyaz.” Duez neengz mbeel feadk xic aul ndaagt bas soml soml bail haab duez gugt, gugt yac riangz deel dungx haaix, mizguanc guas ndaix nec ndeeul, ndangl hal riez duez gugt duc ngaix haab. Ieh duez gugt xic juangh bail ndael ramx ndiex, duez neengz hooznyaz xic deeuz bais.

Xez deel deeuz deec, miz ndaix eemh ndilriz xic bail gaz rongz duez gaaaul. Duez neengz xic daic, nauz: “Gul haaix hingz duez gugt laaux, mizguanc gul xic sel duez gaaaul nec.”

Duez Lingz Neec Rongz Bool

Lix ngonz ndeeul, duez lingz neec ndeeul dungx ieh, xic rongz bool dauc ral mbahyaangz genl. Duez lingz neec deec rongz bail dangz mbeenx rih hauxdais ndeeul, yius reenl gool hauxdais lix waagt laail. Deel xic eex ndaix jic waagt dauc lac, ndingh reeul ndingh bail.

Guas ndaix gus ndeeul, deel bail dangz ndongl masdaauz, reenl lix masdaauz laail, yac ndingl yac laaux. Duez lingz deec xic weenh gaais hauxdais jaangl fengz deel, xic binl bail gool daauz, mbeadt ndaix jic ndeenl daauz dauc lac, ndingh nauz weanl ndingh bail.

Deel byaaic dangz mbeenx rih dianglgual ndeeul, reenl dianglgual ndael rih deec laaux jaxxiz, baux lumc ndeenl roonghndianl nic, ndiljaiz laauhhoh. Deel xic weenh masdaauz xeel, bail umx ndeenl dianglgual.

Duez lingz deec umx ndeenl dianglgual deec dangz jaangl ronl, yius reenl duez durec ndeeul, ndiljaiz jaxxiz, deel xic

weenh ndeenl dianglgual deec xeel, bail laih duez ducrec deec.

Duez ducrec deec seedt nyamz guas, duez lingz deec laih miz deebk, xic aul miz ndaix duez ducrec deec. Baiz nix, deel yaangmaz duc miz ndaix, xic daaus dauc raanz daic ndooil.

Miz Haec Saml Mauz

Meanh xaux lix bux ndeeul gueh sais, deel daanc genl xeenz feax, ieh ngaix deg jangl. Xez boz wenz hams deel wooil yaangmaz deg jangl, deel nauz: “Ngonz nix gul byaac dangz deeuz ronl nix, xic deg gul daanc genl ndooil feax. Xez gul xaaux dangc sais deec, gul yac nih nauz gueh ndaix saauh laez xic aul saauh deec, mizguanc guaslangl feax songs haec gul jic deeuz ianl, jic bingz lauc. Ieh, gul miz lix xeenz gueh raanz jigt, gul aul xoox xozxaaul bail aul jigt dauc gueh raanz gul.

“Xez daz idt ndaix mbahyaangz feax hal jigt deec, ndael saml gul haslix qyah qyuh. Guaslangl gul ndingh dangz langl ndingh saml laaux geh, aul gaais feax ndingh langl ndingh laail geh. Daz idt aul xib manz, daz ngih aul bas manz, ieh dangz jic xianl manz, jic faanh manz. Xez nix gul ianh miz leeux bais. Hanhmizlaail wenzbeangz reenl gul banz dangcnix ieh, xic miz haec gueh lumc gul nic.”

Lix xonz haaus ndeeul gueh dangcnix nauz: Bux laez gueh suans waaih xic gah lix gaais suans naanh dauc xus ndaangl

deel, bux laez gueh suans ndil xic gah lix suans ndil dauc
haec.

Bux Sooh Bail Gueh Hees

Meanh xaux lix baus ndeeul, gal raanz deel xiez deel bail gueh hees. Deel xic riangz yah deel nauz: “Mengz baangl gul nyib jongs was ndeeul, xoohez gul bail riangz feax gueh hees.”

Dangz ngonz bail gueh hees deec, yah deec yangx jongs was haec deel. Yah deec riangz deel nauz: “Mengz deenc beanh neeh noox.” Baus deec riuc jongs was bail gogt xaz roongl daaic deenc, soongl gal xoonl bail gal was ndeeul, xoonl goongl xoonl goongl, xoonl leeux byoongs ngonz yac xoonl miz banz.

Yah deec qyuh raanz riangz leg deel nauz: “Xez nix booh mengz bail dangz mbaanx feax genl nooh, gaais dangz bas dangz bas, gaais dangz hooz dangz hooz bais.” Baus deec haanl guas gogt xaz roongl daaic dauc.

Yah deec hams deel: “Mengz guehmaz fih bail dangz xez nix mus?” Baus deec haanl: “Mengz nauz haec gul deenc was beanh neeh, gul xic deenc gal ndeeul beanh gal ndeeul,

wihlaais deenc dangz xez nix duc deenc fih banz.” Yah deec
xic hudt: “Baus booilxuiix nix, baus xalsoz nix, guehmaz bail
uax dangcnix leex!”

Rongz Nail

Lix baiz ndeeul rongz nail laaux, xic rongz henz gaabt ngonz, nal lix saaml sons dangcnix. Basnaamh, genz raanz, ndael bool, byaail faix jiez laez duc haaul leeux. Jic ngonz deec xeengx laail, lix boz ndeeul miz ndaix bail laih duez dauc raanz, jongs duez qyuh ndael bool deec xeengx laail xic daail bais.

Jongs nyeezneec miz rooxnyiel xeengx, xic bail jaangl nail guehxamz. Boz ndeeul aul nail honc gueh wenz, boz ndeeul aul nail honc gueh jongs duezduez, boz ndeeul aul nail dungx haaix, boz ndeeul xic aul nail bux gueh raag xus eeul bux, haaix ndilmaiz leeux.

Boz bux jees xic nauz: “Xeengx banz dangcnix, jongs nyeezneec haslix qyuh jaangl luangs guehxamz nail ndaix. Hohrauz qyuh ndael raanz saul fiz duc haslix rooxnyiel xeengx. Lumc xonz haaus nauz, ‘Bux neec el daih nail ndingh bail jail ndingh rauc, bux laaux el daih waais ndingh suaais fiz ndingh xeengx.’” Xez deec, boz bux laaux reenl jongs

nyeezneec guehxamz nail ndilmaiz laail, xic ndilmaz lac bail
riangz hohdeec dungx guehxamz nail.

Guas Ronl Jibt Ndaix Waanl

Meanh xaux lix soongl bux wenz ganx dungx dooih bail beangz laaux baans suans. Lix ngonz ndeeul, hohdeec bail dangz jaangl ronl, soongl bux deec lix bux ndeeul jibt ndaix fah waanl ndeeul. Bux miz jibt ndaix deec nauz: “Hohrauz jibt ndaix fah waanl ndeeul nax.” Bux jibt ndaix deec nauz: “Deg gul jibt ndaix, miz deg mengz jibt ndaix, guehmaz xic nauz gueh rauz jibt ndaix mus? Fah waanl nix deg gaais gul, mengz miz lix fens.”

Guas ndaix neec ndeeul, bux haaix waanl dogt deec laih deebk hohdeec, daaus riangz hohdeec ndaix waanl daaus. Bux jibt ndaix waanl deec riangz bux dungx dooih riangz deel deec nauz: “Hohrauz leeux bais.” Bux deec nauz: “Mengz miz haec nauz, hohrauz leeux bais, aul nauz, gul leeux bais deec, yincwooil xez jibt ndaix waanl deec, mengz miz nauz gueh gaais soongl bux rauz, mengz nauz gueh gaais mengz ndooil.”

Hoh wenz lix mbahyaangz miz banl haec feax deec, dangz xez lix suans deec yac miz lix bux laez baangl.

Max Neec Haamc Dah

Lix ngonz ndeeul, max neec lac haamc bail baangx unx. Deel miz rooxheeh ramx laag nauzxic mbogt, xic hams duez xiez laaux. Duez xiez laaux nauz: “Ramx miz laag, xaaux laag dangz lac dungx gul.” Mizguanc lix duez yuangz neec ndeeul qyuh heenz dah nauz: “Ramx laag, xic laag dangz eeul gul.” Max neec xic miz rooxheeh ramx dah laag banz dangclaez.

Ieh deel xic reenl duez reenz qyuh byaail gool faix, deel xic riangz duez reenz nauz gaais suans haamc dah deec, haec duez reenz baangl deel ndiabk gueh dangclaez gueh. Mizguanc duez reenz xic nauz haec deel gah ndiabk.

Ieh duez max neec xic sooh ndiabk dangz bais, deel xic nauz: “Duez xiez saangl, wihlaais deel nauz ramx miz laag. Duez yuangz dams, wihlaais deel nauz ramx laag. Gul aul gah bail waaic xaaux rooxheeh.” Ieh max neec xic waaic bail. Ramx xaaux laag dangz gums daaix deel ndooil. Duez max neec xic haamc dah bail unx ndaix bais.

Gul Maaic Baangl Dungxxoz

Ngonz dooh sel daz idt deec, lix faangx dungxxoz ndeeul nangh heenz ndaangl gul, deel fih ndaix sel moos. Xez laauhsec heeh leeuxboz haail sel deec, deel xic seens leeux. Gul soohnyaangh aul sel gul dies xus jincjaangl xoongz soongl bux hohdul. Deel rooxheeh gul yac haec deel riangz dungx qyox, xic reeul xus gul, gul yac reeul xus deel. Soongl bux hohdul xic dungx yungh benz sel ndeeul dooh.

Xez gueh soznyeez, lix faangx dungxxoz ndeeul haaix jiancbiz raagt bais, deel seens leeux. Gul soohnyaangh aul seenc jiancbiz jaangl fengz haec deel yungh, ieh daaus haail haabk jangl jiancbiz aul seenc moos dauc yungh. Deel reeul xus gul, gul yac reeul xus deel.

Leeuxboz hanh gul maaic baangl dungxxoz. Laauhsec haec gul nauz wooil yaangzmaz xic gueh dangcnix gueh. Gul nauz: “Gul yius reenl bux laez miz lix, gul xic saml jeedt leeux, xic nih baangl deel.” Leeuxboz rooxnyiel haaus nix, xic nauz: “Mengz gueh dangcnix gueh xic ndil laauhhoh. Hohdul yac aul xoz mengz gueh dangcnix gueh.”

Duez Meeuz Neec Ndeeul

Lix duez meeuz neec ndeeul, haadt haadt haec mac deel baangl deel ras nac. Mac deel duc baangl deel ras, yac soonl deel gaab duez waauc, mizguanc duez meeuz neec deec miz yuanl xoz.

Lix ngonz ndeeul, mac deel ooh bail rooh, xeel meeuz neec gah qyuh raanz. Ieh meeuz neec miz roox ras nac, bail riangz buxduz guehxamz. Buxduz xaz deel eexximz, miz lix bux laez yuanl riangz deel guehxamz. Duez waauc yac seedt dauc loongh deel, meeuz neec yac hooznyaz, yac laaul.

Mac deel daaus dauc dangz raanz, reenl deel daic sazegt leeux. Mac xic hams deel nauz: “Mengz guehmaz daic banz dangcnix mus?” Deel xic haanl nauz: “Gul miz ras nac, bux laez duc xaz gul eexximz, miz lix bux laez riangz gul guehxamz.” Mac deel daaus riangz deel nauz: “Mbanh nix mengz aul xoz ras nac fih?” Meeuz neec xic haanl nauz: “Mbanh nix gul aul xoz gah ras nac bais. Gul yac aul xoz gaab waauc.” Xaab baiz deec dauc, meeuz neec xic gah ras nac bais, yac rooxheeh gaab waauc.

Baus Ndeeul Ndaml Mbux

Meanh xaux, lix bux ndeeul ndaml gaul legmbux ndeeul, gaais gaul deec dauc mbael log leeux, aangl jic guz wal haaul. Wal lons ieh, gaul deec xic lix jic ndeenl mbux neec, nams laauhhoh. Bux deec idt ngonz aul bail gauc jic daaus.

Lix ngonz ndeeul, deel yius reenl gaais mbael deec lix jic duez noonl. Ndael saml ndiabk: *Lix jic duez noonl laaul yaangzmaz*. Deel gah jumh mbux neec nauz: “Mbux neec gul hax, mac ndil neeh, mac ndil neeh. Mac ndil lumc guac laaux nic xaaux banz.”

Lix bux heenz raanz ndeeul yius reenl, riangz deel nauz: “Mengz miz haec gahdamx eemh legmbux ndooil. Gaais mbael deec lix noonl, mengz aul iel gac noonl nyamz neeh bais!” Bux deec xic rooxnyiel banz dangz liangl dangz gah, deel nauz: “Yaangzmaz? Mbael deec banz noonl lix maz iel maz? Gul aul xic deg ndeenl mbux!”

Guas ndaix jic ngonz, ndael deec xic lix noonl laail geh,
mbux nec yac bians heenc bais, baiz ndeenl baiz ndeenl lons
dauc lac leeux.

Waaiz Eex Xus Dah

Meanh xaux, wenz gueh rih gueh naz duc aul gues bail bah. Ndidtndaadk laaux, wenl dauc, byac raiz duc bail gueh hoongl, need haux jic need haanh.

Duez byal ludt dogtxel ndeenl naanh boz wenz. Lix ngonz ndeeul, bux wenz guas dah, duez byal ludt riangz bux wenz nauz: “Hohsul gah bah rih bah naz naanh laail bais. Duez waaiz reengz laaux, hohsul aul maanc bail mboongh ndangl hohdeec, haec hohdeec baangl hohsul xuail naz xuail rih max.” Bux wenz xic gacnyiel duez byal ludt nauz, xaab xez deec dauc, bux wenz gueh rih gueh naz duc aul duez waaiz bail xuail.

Xez byal ludt riangz bux wenz dungx gaangc deec, duez waaiz qyuh ndael dah aabk, xic rooxnyiel saauh gaais haaus byal ludt riangz bux wenz nauz deec. Duez waaiz nyaz gaais nac ngamc leeux, deel seedt bail riangz jongs bixnuangx deel dungx liangh nauz: “Jongs duez byal ludt dungx qyah deec haec hohrauz dogtnaan. Dauc rauz waanz ianl hohdeec, rauz ngonz ngonz duc aul angh eex xus dah haec hohdeec

genl.” Xaab xez deec dauc, duez waaiz idt daaus guas dah
duc angh eex xus dah haec byal ludt genl.

Ducrec Neec Bians Gueh Duez Gugt

Lix duez ducrec neec ndeeul saml seeuc laail. Ducrec neec xangxrah saml seeuc. Mac deel lac haec deel gueh saml laaux. Mbenl laabt bais, mac deel xic haec deel bux dooh gah songs legbaag bail haec daais deel. Ducrec neec gah guas ronl bail raanz daais deel deec, ronl deec yac neec yac jail. Deel ndillaaul leeux, ndael saml deel ndiabk: *Ndongl faix nix deg miz deg lix duez langx nis? Ndael nyal nix hoongz xoh xah xoh xah, deg ngeaz qyuh baaih langl bax?* Ducrec neec ndingh nih ndingh ndillaaul geh, deel sazndodt baiz ndeeul, haaix rib dinl ndeeul doons.

Xez deec, ndael saml deel nih: *Ndilmaz lac bians banz duez gugt laaux ndeeul, bians banz duez gugt laaux, yaangz maz duc miz laaul bais.* Ieh xic duez ducrec soohnyaangh runs dauc, nauz: “Gul deg duez gugt.” Deel guas ronl xingh heeuh: “Duez gugt laaux dauc bais, duez gugt laaux dauc bais!”

Dangz basdul raanz daais deel duc haslix heeuh, daais deel qyox deel xic reeul. Duez ducrec neec nauz jah leeux: “Daais, duez gugt laaux dangz bais!”

Bux Neec Genl Langl

Meanh xaux, lix xooix neec ndeeul, xooch deel nauz gueh Jazjinh. Raanz deel hooc, deel xic bail gueh legwoois raanz yuaxwaail ndeeul.

Lix ngonz ndeeul, raanz yuaxwaail deec lix bux hees dauc dangz, baussuc xic baaiz haux haec bux hees genl. Deel xic xaas Jazjinh bail rooh, riangz Jazjinh nauz: “Bux laaux genl goons, bux neec genl langl, xac hohdul genl ieh mengz xaax dauc genl.”

Haadt langl, Jazjinh bail xuangs waaiz, deel xic gah xuangs jongs duez laaux bail genl nyiec, xic jangl jongs duez neec qyuh ndael hooh. Jongs duez waaiz neec xic qyuh ndael hooh raiz heeul rianh leeux.

Xez Jazjinh laih duez daaus dauc xogt deec, baussuc sooh reenl Jazjinh xic hudt nauz: “Jazjinh, mengz banz bah baic bax! Mengz guehmaz xeel jongs duez waaiz neec qyuh ndael xogt mus?” Jazjinh xic haanl baussuc: “Mengz nauz, ‘Bux laaux genl goons, bux neec genl langl,’ gul xic xuangs duez

laaux bail genl nyiec goons, xeel duez neec genl langl.”
Baussuc xic hooznyaz damh deeh leeux.

Bux Wenz Dams Neec Ndeeul

Lix bux ndeeul yac dams yac neec, yac qyahfaz, miz lix bux laez maaic deel. Deel gueh hoongl naagt miz ndaix. Deel ndiabk deel miz roox gueh yaangzmaz genl. Lix bux jees ndeeul nauz deel: “Mengz gueh hoongl miz ndaix, gul nauz haec mengz gueh yaangz ndeeul.” Bux dams deec nauz: “Gueh yaangzmaz, mengz bux laaux nauz haec gul las.” Bux deec xic nauz haec deel: “Mengz xiangx bidt ieh bais, daez bidt yac miz aul reengz.” Deel xic aangh leeux, il bux deec nauz xic bail xiangx bidt.

Daz idt xic xiangx bidt neec. Bidt neec laaux deel yac miz gaail, xic xeel gueh bidt jais. Mbanh nix lix bidt jais laail, yac ngonz ngonz dauc jais. Deel xic roox nac jibt jais bail gaail ndooil. Deel gaail jais ndaix xeenz laail. Mbanh nix lix wenz maaic deel bais. Lix maix ndiljaiz ndeeul maaic deel laail, deel xic aul maix deec dauc gueh yah. Ieh deel xic banz raanz bais. Xaamx deel miz xiangx bidt, xic miz lix xeenz, deel xic miz banz raanz daaus laez bais.

Duez Gugt Ndinghhal Duez Mooil

Duez gugt ndinghhal duez mooil deg buxduz ndil. Hohdeec dungx bail ral mbahyaangz genl. Duez gugt yius reenl duez lux ndeeul, duez mooil riangz duez gugt nauz: “Duez lux seedt nyamz laail, hohrauz dungx banl bux ndeeul qyuh baaih langl bux ndeeul qyuh baaih nac doonc.” Ieh xic duez gugt qyuh baaih langl laih, duez mooil qyuh baaih nac doonc, xic haaix duez lux deec mooic bais.

Duez gugt nauz: “Duez mooil, gueh dangclaez banl duez lux mus?” Duez mooil nauz: “Bux laez haaix ndaix bux deec xic ndaix laail dol.” Duez gugt nauz: “Gaaisdeec gul yius reenl duez lux goons.” Duez mooil nauz: “Yius reenl goons yac miz lix yungh, xaamx gul miz qyuh baaih nac doonc, mengz xic gueh dangclaez gaab ndaix mus?” Soongl bux dungx xeengl dungx haaix, dungx haaix naais xic goongl bail basnaamh.

Qyuh xez deec duez lux rooxnyinh bais, duez gugt ndinghhal duez mooil runs miz dauc, duez lux xic deeuz bais. Duez mooil ndinghhal duez gugt xic bux eemh bux ndooil, gah

dungx nauz: “Hohrauz dungx ndil xic haaix ndaix duez lux,
dungx ndah xic liel duez lux bis jaangl fengz.”

Daez Xiez Ral Miz Reenl Xiez

Lix daaus ndeeul, lix sis hac xooix legsaail xuangs xiez bail jiez dooh daez. Xez daz idt hohdeec dungx guehxamz ndilmaiz leeux. Guas ndaix baizqyaaih naanz, lix xooix ndeeul ndunl qyuh baaih genz, lix xooix ndeeul ndunl qyuh baaih lac. Xooix ndunl qyuh baaih genz deec gaml seenc faix rod neec ndeeul qyuh baaih genz jauc xooix ndunl qyuh baaih lac deec feadt guehxamz, ieh xic feadt ndaix eeul xooix baaih lac deec. Xooix deec xic ngas rianh leeux, nauz: “Feadt ndaix eeul gul baic las!” Haaix eeul xooix deec banz jic dug ndingl, xooix deec xic hooznyaz riangz xooix ndunl baaih genz deec dungx haaix laaux.

Jongs xooix qyuh heenz deec xic duans hohdeec, mizguanc gueh dangclaez duans hohdeec duc miz il. Ieh hohdeec nauz: “Hohsul xingh dungx haaix, duans hohsul yac miz il, hohsul haslix aul dungx haaix dangz xez laez mus? Xiez hohrauz bail jiez laez leeux baic ges!” Hohdeec xaax ieh, ieh xic leeuxboz xaax seedt bail ral, mizguanc hohdeec ral miz reenl, miz rooxheeh xiez bail baaih laez. Haadt deec hohdeec leeuxboz dauc raanz ndooil, ral miz reenl xiez.

Duez Doos Ndaadk Legneec Daail

Meanh xaux lix maix ndeeul, leg deel ndaix sis hac ndianl dangcnix. Deel el leg deel bail rih riangz bah rih. Bail dangz ndael rih, xic xeel leg deel gah nangh ndael donz, ieh deel xic rongz bail baaih lac donz bah rih bais.

Bah rih ndaix baizqyaaih naanz, leg deel daic bais, deel xic henc dauc ndael donz jeex leg deel, jeex ieh xic aul leg deel daaus ninz ndael donz, xic daaus rongz bail bah rih.

Mbanh nix xic lix ndaagt baangc doos dauc ndaadk leg deel, leg deel xic daic ngas rianh leeux. Mac deel miz rooxheeh duez doos ndaadk leg deel, xic jaailnauz leg deel gah daic ndooil, xic mauz bah rih, dangz xez deel lac dauc eemh deec, leg deel xic ndamx bais! Deel xic miz bail eemh.

Dangz xez deel lac bail raanz deec, deel xic lac bail el leg deel bail raanz, mizguanc deel henc bail dangz heenz donz xic reenl jongs duez doos rumc leg deel leeux. Xez deec leg deel yac daail bais. Deel lac bail aul leg deel yac bail aul miz

ndaix, xic qyuh heenz donz eemh leg deel daic rianh leeux
ndooil.

Saaul Xiangl

Xez xaux, miz lix bux laez bail dangz ndael mbaanx hohdul saaul xiangl daaus laez, yac miz rooxheeh saaul xiangl banz dangclaez.

Xez gul ndaix beedt bil deec, lix baus ndeeul xuanh mbaanx saaul xiangl, baus deec xuanh bail dangz mbaanx hohdul, xic lix wenz saaul xiangl laail laauhhoh, mbael xanglbianl ndeeul hac joz xeenz. Gul maaic saaul, mizguanc miz lix xeenz, gul xic bail riangz mac gul aul, mac gul miz lix haec, gul xic daic. Daangs bux daangs bail saaul xiangl yongc yaangs leeux. Gul ruangh gaais dungx banz ramx leeux, haaix ooh daic xez ngaaliz bail dangz lac laabt, xingh ndunl qyuh jiez dooh, miz byaaic yac miz nangh. Mac gul meeuh yac miz ndamx. Guaslangl gul daic imh xic gah ieh.

Goc gul bail xunz dauc dangz raanz, mac gul xic riangz deel nauz: “Neec, gul reenl mengz lix manz ndeeul lez maz, banl hac joz haec nuangx bail saaul xiangl lez gox.” Goc gul nauz: “Gul ndaix hac joz bail saaul xiangl, ieh banl hac joz haec buxduz gul, miz lix bais.” Gul rooxnyiel goc gul nauz

dangcdeec, gul xic daaus xuangs hingl daic rianh leeux, nyaz
goc gul laauhhoh.

Bux Daez Yuangz Hal Duez Langx

Meanh xaux lix bux wenz ndeeul, xiangx baangc yuangz ndeeul. Lix duez langx ndeeul ngonz ngonz qyuh riangz, daez yuangz sooh sooh, miz gueh yaangz maz suans waaih.

Mizguanc bux daez yuangz deec miz sins deel, qyox deel daangs bux wenz waaih ndeeul, ndael saml xingh ruangh, ngonz ngonz daez yuangz gueh ndil. Duez langx deec yac ngonz ngonz bail riangzlangl yuangz, miz ndiabk aul genl yuangz guas. Guaslangl bux daez yuangz xic miz ndiabk duez langx deec deg duez gueh waaih, haslix nauz deel deg duez xaangh daez yuangz ndeeul.

Lix ngonz ndeeul, bux daez yuangz deec bail jeex, deel xic aul yuangz haec langx daez. Langx xic aangh leeux, meangh gaais xez deel miz qyuh deec xaaux genl duez yuangz deel. Ngonz deec langx xic haab dingz yuangz ndeeul daail. Bux daez yuangz daaus dauc dangz, yius reenl dingz yuangz ndeeul ngaix haab daail, deel xic qyeenh leeux. Ieh deel xic gaab aul duez langx deec, ndaix xah weenl duez langx deec jauc dungc rongz, jaangs deel gueh daail.

Aabk Damz

Ndael mbaanx hohdul lix gaauh damz ramx ndeeul, guaangs lumc hoongs raanz ndeeul dangcnix, laag lix soongl xiangh. Mbaanx hohdul aul ramx ndael damz deec dauc dah haux, bux wenz bail gueh saag, aabk yac banz.

Dangz ndianl ndaadk, hohdul maaic bail ndael damz deec aabk laauhhoh, ngonz ngonz duc dungx xiez bail aabk. Lix daaus ndeeul hohdul bail aabk, jongs buxduz gul juangh qyah laauhhoh. Hohdeec juangh bail dangz diec damz, gual ndaix daex hal nyas dauc genz. Gul ndiabk: *Gul bail xeh xeh, gauc bail dangz diec damz ndaix miz.* Ieh gul xic juangh bail ndael deec, bail dangz dingz ndeeul xic mbaadt xel miz ndaix, gul xic soohnyaangh daaus bail genz.

Xez gul daaus dauc genz deec, xic genl ramx og aag leeux, mizguanc fih bail dangz genz naaus. Baiz nix gul xic xangchis xeengs bail genz, mal dangz genz ieh, oh gaais dal haaul leeux. Jongs buxduz xic hams: “Mengz guehmaz banz dangcnix mus?” Gul haanl miz dauc, xez deec hac daail lac ndil, ndilmaz lac xeel deez mingh xus ndael damz deec.

Xaab xez deec dauc gul xic hidt, miz daaus juangh bail diec
damz daaus laez bais.

Dungx Xeh Reengz

Xez gul ndaix xib rogt xeedt bil deec, reengz xaax dauc, maaic bail gueh yaangzmaz hoongl yac miz jaizhooc. Idt daaus leeuxboz ooh bail gueh hoongl duc ganx dungx xeh reengz, gauc bux laez ndangh geh.

Lix raanz ndeeul ramc faix was, xic xaaml gul hal jongs buxduz bail baangl daih faix. Xez hohdul bail dangz jaangl ndongl faix deec, xic yius reenl ndaagt mongc faix qyuh jiez deec ndaagt laaux laaux, ndaagt neec neec. Hohdul leeuxboz xic nangh genz faix deec dac byaauz, nauz bux laez reengz laaux, bux laez dungx haaix qyah. Qyuh xez deec, bux laez duc gah nauz ndaanglgaus ndangh, miz lix bux laez laaul bux laez.

Lix bux ndeeul heeuh nauz: “Bux laez dauc riangz gul dungx ruaaml ndaagt faix nix?” Bux qyuh heenz deec xic soohnyaangh haanl: “Ndaagt faix xaax laaux saauh nix, aul soongl bux dungx ruaaml, mengz miz ndilraaiz maz? Ndangh xic daangs bux daangs gah dez jangs, dez miz ndaix xic uaail

gul.” Leeuxboz duc haanl nauz: “Bux laez laaul bux laez loogk.” Leeuxboz duc dez ndaagt laaux dungx saauh.

Haamh deec gul dauc dangz raanz, xic rooxnyiel headt jeedt. Xaab xez deec dauc, idt baiz dez mbahyaangz naagt, headt gul duc jeedt, gul duc nih dangz gaais suans deec.

Duez Gugt Ndinghal Duez Lux

Ndianl rauc, duez lux neec bail baangx dah genl ramx. Deel yius reenl ngauz deel qyuh ndael ramx, ieh deel ndiabk: *Gaul gul ndiljaiz laail has!* Ieh deel yac yius reenl gal deel, weanc his baiz ndeeul, nauz: “Gal gul yac neec yac qyahfaz, miz dungxhal riangz gaul gul.”

Xez deel ndiabk ndanghgaanx deec, soohnyaangh lix duez gugt ndeeul seedt dauc xus deel, duez lux neec qyaux gal xic leez deeuz bais. Duez gugt xingh laih deel. Soongl fus gal duez lux yac neec yac qyahfaz, mizguanc xic seedt ndangh jaxxiz! Duez lux ndingh seedt ndingh nyamz, haaix liez duez gugt jail jail.

Baaih nac xic deg ndongl faix, duez lux xic ndiabk: *Xaamx ndoonx bail ndongl faix, duez gugt xic gaab gul miz ndaix bais.* Duez lux dingz ndiabk dingz seedt bail ndael ndongl faix deec. Mizguanc duez lux fih seedt ndaix qyaamh ndeeul, gaul deel xic dungx jeeuc riangz gaul faix, gueh dangclaez yac nyiangl miz ooh. Yius reenl duez gugt ndingh laih ndingh dangz jaec, duez lux neec deeuz miz ndaix xic xac daail

ndooil. Deel weanc baiz his nauz: “Ndiabk miz dangz gul miz
maaic gal, mizguanc xic gal jaus ndaix gul. Gul maaic gaul
gul, mizguanc gaul haais gul.”

Seeh Gacloox Nuangx

Meanh xaux lix raanz ndeeul lix soongl xooix legmbegt. Seeh xic gaail bail raanz guaangl, nuangx xic gaail bail raanz hooc, mizguanc seeh deel miz jaiz nuangx deel, yac eemh nuangx deel miz xiangz. Nuangx deel miz lix haux genl, xic bail xaaml seeh deel aul haux. Seeh deel jauc banz raul laail, deel miz rooxheeh gueh dangclaez nauz miz aul haux haec nuangx deel, xic gacloox nuangx deel nauz: “Mengz baangl gul ral raul genz jauc gul guehleeux, gul xic aul haux haec mengz.”

Mbanh nix nuangx deel xic baangl deel ral raul, nuangx deel ral raul haec deel leeux ieh, deel xic daagt ndaix jic gaail haux haec nuangx deel. Nuangx deel xic bail raanz bais. Bail miz saauh laez jail, seeh deel xic daaus seedt bail riangzlangl nuangx deel nauz: “Mengz ral raul genz jauc gul fih leeux, gul miz aul haux haec mengz.” Nuangx deel xic haanl nauz: “Gul ral haec mengz leeux baic las, haec gul gueh dangclaez ral deeml mus? Laaulnauz mengz lac miz aul haux haec gul xic gueh dangcdeec nauz muc ndais!” Seeh deel xic haanl gaais nac gueeux leeux: “Gul nauz mengz ral fih leeux xic fih

leeux.” Xic soohnyaangh qyaabk nuangx deel ndaix haux
daaus bail. Nuangx deel xic qyuh jiez deec daic sazeit leeux,
daaus bail raanz ndooil.

Dungx Dax Dius Rinl

Qyuh jiez hohdul deec, lix biz bool saangl ndeeul, dinl bool deec lix ronl seec. Xez gul fih roox maz ndilriz deec, lix ngonz ndeeul, gul hal sis buxduz bail bool deec aul fenz dauc raanz xus fiz. Hohdul bail dangz bool duc maaic dungxdax dius rinl, gauc bux laez dius bail jail geh. Xez hohdul dius rinl deec, rinl gul dius bail jaec geh leeuxboz, gul gah hooznyaz xic miz gaangc riangz hohdeec.

Daaus langl gul xic ral ndaix ndaagt rinl ndeeul, laaux lumc gaauh baaic nix dauc dius. Daaus nix rinl hohdeec dius bail miz saauh laez jail xic dangx, mizguanc ndaagt rinl gul deec haslix dius qyah. Xez ndaagt rinl dius lac bail dangz ronl seec, xic jazjaz lix bus seec ndeeul dauc dangz jiez deec. Gul yius reenl ndaagt rinl lumcbux dius bail hoz genz seec, xic aagt loms leeux. Hohdeec yac xeenh heeuh nauz:“Ndaagt rinl mengz dius hoz genz seec waaih bais, bux haail seec deec seedt dauc genz nix gaab mengz bail jangl bais.”

Hohdeec ndillaaul ngaix gaab xic seedt bail jiez ndooil aul fenz, gul xic gah seedt bail baaih ndooil aul, mizguanc saml

gul yac xeenh wanc. Gul xaax ndaix geadk neec ndeeul,
xic seedt dauc raanz haax haanh lail leeux. Dangz jaangl
haamh, gul ndillaaul bux haail seec deec dauc raanz ral gul,
ndael saml gul xic wanc leeux. Mizguanc miz lix bux laez
dauc ral, gul xic aangh laauhhoh.

Soongl Bixnuangx Legsaail Dungx Banl

Meanh xaux, lix soongl bixnuangx legsaail. Laaux goc banl laaux nuangx qyuh liangl, miz aul yaangzmaz haec deel. Aul riangl haux weangc ndeeul haec ndooil. Laaux nuangx deec xic ndaix riangl haux weangc deec bail dogt xus rih. Haux weangc deec mac ndil laauhhoh, daaus banz riangl laaux. Duez romh dauc genl leeux. Laaux nuangx bail dangz rih miz reenl lix riangl haux weangc laez, deel xic ruangh laail nangh ndael rih daic. Daic naanz laail xic ngaeh. Baiz nix lix duez lingz ruaaml deel bail dies xus ndael gaamc, gaamc deec lix nganz laail. Deel rooxnyinh xic reenl lix nganz laail laauhhoh, deel xic ndaix nganz dauc raanz.

Goc deel reenl xic hams deel: “Mengz bail jiez laez ndaix nganz laail dangcnix mus?” Deel xic lenh gaais suans nix haec goc deel guehleeux. Mbanh nix goc deel daaus riangzlangl gaais suans nuangx deel lenh deec bail gueh. Deel bail nangh mbeenx rih deec daic, daic ngaeh bais. Duez lingz daaus dauc ruaaml deel bail, ruaaml dangz jaangl ronl, deel ooh gaauh reedt ndeeul haul laail. Duez lingz rooxnyiel

haul laail ngaix miz ndaix, xic weenh xus jaangl ronl, miz
dez deel bail gaamc deec, miz haec deel aul nganz.

Nyuh Xus Was

Xez gul dooh huh nyianx jiz deec, miz deg qyuh ndael mbaanx, xic bail mbaanx rooh dooh. Lix saaml buxduz bail deeml, hohdeec yac dooh huh nyianx jiz dungxlumc gul.

Lix ngonz ndeeul, hohdul guas raanz bail xozxaaul, byaaic bail dangz jaangl ronl, xic reenl lix bux ndeeul ninz qyuh heenz ronl, lumc bux laez deel genl lauc fiz nic. Hohdul xic laaul seens leeux, miz aul guas reedt jaec bux deec bail, xic ndiabk aul ngoomx guas heenz dah henc bail jaangl ronl. Guas dah bail dangz jaangl ronl jail baizqyaaih, hohdul yac dez mbahyaangz deeml, hohdul xic henc bail mes meec leeux, laaul his bux ninz qyuh heenz ronl deec byaaic dangz goons.

Hohdul henc lac bail dangz jaangl ronl, xic ndiex jaangl nyal, qyox baaih nac baaih langl, eemh bux deec dauc miz, lumc bux laez rooxnyiel lix hingl dinl hoongz, mizguanc eemh miz reenl wenz. Hohdul xic dungx singl seedt bail goons, ndingh sazndodt ndingh bail. Lix bux ndeeul, nyuh deel lac dauc lac ndil, deel mbaadt miz ndaix, seedt haaix gal xaadt xah leeux,

xic angh nyuh xus was. Hohdul xic reeul nac naais leeux, yac ndillaaul laauhhoh, laaul bux deec dauc laih. Hohdul seedt ndaix baizqyaaih jail, xic bungz yah ndeeul, xic miz ndillaaul bais, mizguanc bux angh nyuh xus was deec, was deel xic lubt leeux.

Aul Naz Dih Xeenz

Meanh xaux, lix mbaanx ndeeul, lix bux guanh naz ndeeul. Bux guanh naz deec maaic riangz feax dungx haaix. Lix hoobt jeex ndeeul, bux guanh naz deec bail hauc jeex. Xez daaus jeex deec, bux guanh naz deec riangz bux wenz mbaanx ndooil dungx dooih daaus jeex, dungx gaangc ndilmaiz leeux. Hohdeec xic gah dungx fuc, bux guanh naz deec fuc miz hingz, deel xic hooznyaz, xic xuil bux deec bail ndael naz bongz. Dangcnix, hohdeec xic dungx haaix laaux. Bux guanh naz deec xic haaix bux mbaanx ndooil deec jauc dauc liadk leeux. Bux guanh naz deec ndillaaul xic seedt bail raanz bais.

Haadt langl, boz wenz mbaanx bux deg haaix deec dauc ral bux guanh naz deec, aul xeenz bail iel. Bux guanh naz xic haanl: “Gul miz lix xeenz, yac miz lix yaangzmaz.” Hohdeec miz rooxheeh gueh dangclaez gueh, lac riangz bux guanh naz deec dungx haaix baiz moos, mizguanc hohdeec miz gaamc haaix, yincwooil mbaanx bux guanh naz deec lix wenz laail. Hohdeec xic bail gaaus haec gungcseel dauc baans suans nix, hoh gungcseel xic nauz: “Aul naz bux guanh naz deec haec

bux wenz ngaix haaix jeedt deec, dih gueh xeenz, xic miz lix yaangmaz suans bais.” Bins dangz xez nix, bux wenz yius reenl dongh naz deec xic ndiabk dangz baus deec dungx haaix.